

# Мўминнинг иши ажойиб | Сийрат дарслари (243-дарс)



19:00 / 19.08.2023 1961

263. Абу Ҳурайра розияллоҳу анҳудан ривоят қилинади:

«Эй Аллоҳнинг Расули, Қиёмат куни сизнинг шафоатингиздан энг саодатманд бўладиган ким?» дедим. **«Эй Абу Ҳурайра, сенинг ҳадисга ўта қизиқишингни билганимдан шу гапни сендан олдин ҳеч ким сўрамаслигини билган эдим. Қиёмат куни шафоатимдан энг саодатманд бўладиган киши «Лаа илааҳа иллаллоҳу»ни чин қалбдан ихлос билан айтган одамдир»,** дедилар».

*Бухорий ривоят қилган.*

264. Суҳайб розияллоҳу анҳудан ривоят қилинади:

«Расулуллоҳ соллаллоҳу алайҳи васаллам: **«Мўминнинг иши ажойиб, унинг ишининг барчаси яхшиликдир. Бу, фақат мўмингагина бўлади, ундан бошқа ҳеч кимга эмас. Хурсандлик етса, шукр қилади: унга яхши бўлади. Мусибат етса, сабр қилади: унга яхши бўлади»,** дедилар».

*Муслим ривоят қилган.*

265. Абу Туфайл розияллоҳу анҳудан ривоят қилинади:

«Алий ибн Абу Толиб розияллоҳу анҳунинг олдида эдим. Бир киши унинг ҳузурига келиб: «Набий соллаллоҳу алайҳи васаллам сенга нимани сир қилган эдилар?» деди. Шунда у ғазабланди ва: «Набий соллаллоҳу алайҳи васаллам одамлардан яшириб, менга сир айтармидилар! Фақат менга тўрт калимани айтганлар», деди. «Эй мўминларнинг амири, улар нималар?» деди. **«Туққанини лаънатлаган кимсани Аллоҳ лаънатласин. Аллоҳдан бошқага атаб жонлиқ сўйган кимсани Аллоҳ лаънатласин. Бидъатчига жой берган кимсани Аллоҳ лаънатласин. Ер белгиларини ўзгартирган кимсани Аллоҳ лаънатласин»**, дедилар», деди».

*Муслим ривоят қилган.*

**«Расулуллоҳ соллаллоҳу алайҳи васаллам» китобидан**

Ушбу китоб Ўзбекистон Республикаси Дин ишлари бўйича қўмитанинг 2022 йил 30 ноябрдаги 03-07/9078-рақамли хулосаси асосида чоп этилган.